



Gorordok EAJren Plentziako asanblada biltzea lortu du.

MIRIAM GARZIA

Gorordok asteartean hitz egingo du Plentziako jeltzaleen aurrean

Z.Z. / BILBO

Plentziako EAJko udal exekutibak onartu egin zuen Jose Maria Gorordo Bilboko alkate ohiak eskatutako Asanblada, eta datorren asteartean gaueko zortziretarako ipini du eguna. Halere, bozketan exekutibak ez zuen aho batez onartu eskakizuna, gehiengoz baino.

Jesus Anasagasti Plentziako jeltzaleen exekutibako idazkariak garrantzia kendu zion asanbladari, eta ziurtatu zuen ez duela ezer erabakiko eta informazioarako bilera baino ez dela izango.

Anasagastik gaineratu zuen Gorordoren gaia ez dela garrantzitsua

Plentziako EAJrentzat, eta gai hori «beste bat» baino ez dela izango. Izan ere, Bizkaiko herriko EAJko idazkariaren arabera, «zenbait gai garrantzitsu batu dira asanblada horren deia egitea ekarri dutenak», gehiago zehaztu ez bazuen ere.

Gorordok Plentziako Asanbladari deitzeko eskakizuna egin zion herri horretako EAJko lehendakariari, beraren aurkako espediente zabaldua zegoela jakin zuenean, bazkideen aurrean defendatu ahal izateko. Bilboko alkate ohiak Arriola herriko epaile jeltzalearen jokabidea gaitzetsi zuen, espediente Herrialdeko Epaitegiaren esku laga baino lehena goberari abisua eman behar ziolako.



Polizi italiarrak lehegailua aztertzen du robot baten laguntzaz.

REUTER

Indargabetuak espainiar bidai agentzietan jarritako bi bomba

ERROMA

Polizi italiarrak espainiar turismo agentzien aurka jarritako bi lehegailu indargabetu zituen atzo goizean Erroman, hiritar batzuen oharra jaso ondoren. Susmo guztien arabera ETA izan daiteke atentatu saio hauen egilea azken hilabeteetan espainiar interesen aurka European zehar hasitako kanpainaren barruan.

Lehegailu bat 'Ecuador' bidai agentzietatik metro t'erdira zegoen jarrita motxila baten barnean. Bi polizik indargabetzea lortu zuten eztanda egin baino sei segundu lehenago. Motxilaren barnean Poliziak 200 gramo tritol, lau 'Kanping gas' bomba eta lau pote aerosol aurkitu zituen, detonagailu eta tenporizagailu

bati konektatuak. Bigarren lehegailua 'Melia' turismo agentziaren atean aurkitu zuen Poliziak, bidai poltsa baten barruan. Aurreko bonbaren antzekoa zen eta hamar minututan robot baten bidez indargabetu zuten. Falange Armada erakundeak, ETAREN laguntza taldea bere esanetan, bere gain hartu zuen komunikatua Milanoko Banco de Exterior de Españaren aurka jarritako lehegailuaren eztanda. Igandean zabaldu-tako komunikatu berdinean esaten zenez, ETAK, Espainiak Italian dituen interes ekonomikoaren aurka ekiten jarraituko du. Maiatzaren amaieratik hamaika atentatu eta atentatu saio egin ditu ETAK Italian, zazpi Erroman, hiru Milanon eta bakarria Bolonian.

PSOE-EA gobernuaren aukerek urriagoak dirudite bigarren bozketa egunean

Gaurkoan ere UPN eta HB kontra izango ditu Urralburu sozialistak


Gabriel Urralburu, PSOE eta EAKo lehendakariak, Nafarroako lehendakari eusteko bigarren aukera izango du gaur. Aurrikuspenen arabera, Foru Parlamentuak bigarren aldiz errefusatuko du sozialista, UPN eta HBren botoekin.

A.U. / IRUÑEA

PSOE eta Eusko Alkartasunak osaturiko koalizio gobernuak egunetik egunera aukera gutxiago dituela dirudi. Gabriel Urralburu sozialistak Nafarroako Gobernuko lehendakari eusteko bigarren saioa egingo du gaur, eguerdiko ordu batean. Parlamentuko alderdi guztiek herenegungo bozketan emandako botoa aldatzeko asmorik azaldu ez dutenez, Urralburuk berriro huts egingo duela esan daiteke alde aurretik.

Herri Batasunak «ateak oraindik zabalik» dituela adierazi zuen Patxi Zabaletak, baina, leitzarrak gogoratu zuen bezala, «bozketak lau dira». Jakina denez, Gabriel Urralburuk HBren abstentzioa behar du nahitaez eta talde abertzaleak bere jarrera negoziaketaren baldintzapean jarri du. Negoziaketarik ez dagoen bitartean, botoa ezezkoa izango dela argi utzi zuen HBk herenegungo eztabaidan.

Eztabaidan ikusi zenez, bi alderdien argudioak eta jarrerak aldaezinak dira. PSOE-HB negoziaketa guztiz baztertu ondoren, honako argudioak erabili zituen Urralburuk



Urralburuk aukera urriak ditu Nafarroako lehendakaria izateko.

JOXE

HBkoei zuzentzeko: bere programa UPNrena baino hobea dela nafarrentzat, eta bereziki euskaltzaleentzat, eta ona den gauza ez dela txar bihurtzen HBrekin ez negoziatzeagatik.

TENTSIOK GORA ETA BEHERA

Patxi Zabaletak negoziaketa eskaeraren legitimitatea defendatu zuen, «gure botoak beste edozeinenak bezain jatorrak direlako». Aldi berean, PSOE-EA egitasmoa kritikatu zuen, aurrerakoia ez izateagatik eta euskararen inguruan aurkeztu diren neurriak bere iritziz ez direlako inolako lorpenak. Baina, guztien gainetik, sozialisten «garrantia falta» nabarmendu zuen leitzarrak.

ETAK huts egin zuen Hondarribian kotxe bat lapurtzeko ahaleginean

HONDARRIBIA

Burua estalita zeramaten hiru ezezagunek huts egin zuten Hondarribian kotxe bat lapurtzen saiatu zirenean. ETAKide bezala identifikatu ziren hiru ezezagunek kotxe barruan zegoen bikotea zuzaitz batera lotzera zihoaztela, jabeak giltzak galdu zituen. Saiatu arren, ezin izan zuten 'Puenta' egiten eta ETAKideak ihes egin zuten, polizi iturriek Vasco Presi esandakoaren arabera.

Gertakizuna ostegunean izan zen gaueko 11.30etan Hondarribiko faroaren inguruan. Burua estalita zeramaten hiru lagun bikote bat zegoen kotxera hurbildu ziren, eta armaz mehatxatu zituzten ETAKoak zirela esanez. Dirudenez, batek subfusila eta beste batek pistola zeramaten eskuan. Gertu dauden zuzaitz batzuetan katez lotu zituzten ETAKideak, baina bidean giltzak galdu zituen kotxearen jabeak. Komandokoek autoari 'puenta' egin nahi izan zioten baina huts egiterakoan alde egin zuten.

Ordu erdi pasa ondoren, bikoteak bere burua askatzea lortu zuen eta oinez joan zen. Une berean, ezezagun batek Sos-Deiak-era deitu zuen

kotxe jabeen egoeraz ohartzeko. Erreskate taldea inguruetara iritsi zenerako bikotea aldegin zen.

Iturri polizialek uste dutenez, ETAK atentatua egiteko erabili nahi zuen kotxea. Azken egun hauetan erakunde armatuak sei kotxe lapurtu ditu Gipuzkoan helburu berdinekin, saio batzuk huts egin arren.

FRANCISCO GIL HILOBIRATUA

Atzo hilobiratu zuten Donostiako Poiloko hilerrian Francisco Gil Mendoza, Irungo atentatua hildako gaztea. Tentsio handia nabari zen hilerrian bildutako senide eta lagunen artean. Hileta Hendaian ospatuko da ziurrenik senitartean, familiak hala erabaki delako. Francisco Gilen familia aspaldi bizi da Hendaian, donostiarrak izan arren.

Francisco Gil atzo hil zen Irunen, burua estalia zeraman ezezagun bat bera eta anaia zeuden Urdanibia plazako aulkira gerturatu eta subfusil batez tirokatzen hasi zenean.

Francisco Gilek bi bala jaso zituen, bata buruan eta bestea bizkarrean. Alfredo Gil bere anaia ihes egitea lortu zuen inolako zauririk gabe.

Goardia Zibilak laugarren bomba bat lehetarazi zuen

ZARAGOZA

Goardia Zibileko Gedex taldeek Zaragoza-Madril trenbidean jarrita zegoen lehegailu bat lehetarazi dute. Lehegailua aipatutako trenbidearen 319,100 kilometroan zegoen, Alagon (Zaragoza) udalerraren barne. ETAK mehatxatutakoaren artean dago Zaragoza-Madril linea.

Aragoiko Gobernu Ordezkaritzako Eferi adierazitakoaren arabera, Goardia Zibilak erdi lurperatutako pakete bat aurkitu zuen. Berehala, Gobernu Ordezkaritzak «segurtasun neurri guztiak» hartu zituen eta Renferi ohartarazi zion. Trenbide konpainiak trafikoa moztu zuen eta bidaiariak autobusez bidali. Gedexekoek eragindako eztanda ez zuen bidea kaltetu.

Atzokoa Espainiako trenbideetan eztanda egiten duen laugarren lehegailua da, ETAK 6 linea mehatxatu zituenetik.